



საქართველოს მეცნიერებათა ეროვნული აკადემია

ქართული ენციკლოპედიის ი. აბაშიძის სახელობის მთავარი სამეცნიერო რედაქცია

მირმიქელა

მირმიქელა, იგივე მორილ-მიაქელა, ორ- და სამსართულიანი საბრძოლო ხასიათის სვანური ფერხული. დაკავშირებულია ნაყოფიერების ღვთაება კვირიას კულტთან. სრულდება მურყვამობა-კვირიაობის დღესასწაულზე, „მელია-ტელეფიას“ სანესო სანახაობის შემდეგ. მონაწილეობენ მხოლოდ მამაკაცები. ფერხულს შეჯიბრის სახე აქვს. მამაკაცთა ერთი ჯგუფი შეკრავს წრეს და ჩაიჩოქებს. მათ მხრებზე დგება მამაკაცთა მეორე ჯგუფი, რის შემდეგაც ორსართულიანი ფერხული იწყებს მოძრაობას წრეზე. მ-ს ქვედა სართული ზედას ჩამოგდებით ემუქრება. თავის მხრივ ზედა სართული ცდილობს გაუმკლავდეს საფრთხეს. ბოლოს ზედა სართული ჩამოვარდება და უკვე მიწაზე იწყება საერთო ცეკვა-თამაში. ცეკვა მ. სრულდება სართულებს შორის გამართული სათანადო დიალოგის ფონზე, შემდეგ იწყება ქალ-ვაჟთა ფერხული „შინავორგილ“, დასასრულს კი მამაკაცები „ცერულს“ ცეკვავენ.

თუშეთში ასეთ ფერხულს ქორბელელა ეწოდება. ცალკეული მოსაზრებებით სართულებიანი ფერხული ასტრალურ ღვთაებათა იერარქიასა და საბრძოლო ხასიათზე მიუთითებს (იხ. ქორბელელა).

ლიტ.: ბ ა რ ა მ ი ძ ე ბ., ქართული ხალხური და კლასიკური ქორეოგრაფია (ბალეტი), თბ., 2015; ო ნ ი ა ნ ი ჯ., სვანური მურყვამობა-კვირიაობა, „მაცნე, ისტ. არქეოლ., ეთნოგრ., ხელოვნ. ისტორიის სერია“ 1969; #3; ფ ხ ა კ ა ძ ე თ., სართულიანი ფერხულები საქართველოში, „ხანძთა“ 2006, №4; ჩ ი ჯ ა ვ ა ძ ე თ., ქართული მუსიკალური ფოლკლორის მცირე ენციკლოპედიური ლექსიკონი, თბ., 2009.
